

“Su la Rotes del Mond” porta mingol de Asia tel Trentin

La seconda edizion de la scomenzadiva metuda a jir da la Provincia e da l'Arzidiezesa de Trent ne envia a scontrèr nesc misionaries e travers ic a cognoscer la realtà del continent asiatic

Sozietà e istituzions - Peà via con gran ejit l'an passà, rua ades a la seconda edizion l'event “Su la Rotes del Mond”: na setemèna entria per cognoscer teres dalonc e per ge dèr recognosciment a la opera preziosa di misionaries trentins fora per l mond.

La Provincia Autonoma e l'Arzidiezesa de Trent se à metù adum tel pissèr chest event pean via da la conscidrazion che l'é passa 500 misionaries trentins, religious e laiches, che vif e laora stroz per l mond, e entornvia ogneun l'é na familia, na parochia, n grop, na comunanza, donca ic raprejeta dassen n fon leam anter noscia comunità e i pajes dalonc. “Su la Rotes del Mond” l'é na ocajon per envierà chisc misionaries a “vegnir de retorn” a cèsa, ne portèr sia esperienza e ne didèr a cognoscer mingol miec realtèdes desferentes. Te chest event vegn tout ite enche la Sociazions trentines che laora ti desvalives continenc e la comunanzes de imigré che vegn da chisc raions. La prezenza tel Trentin di misionaries doventa donca l met per rejonèr di continenc del mond, pean via da la testimonianzes diretes e tolan cà duc i lengac possiboi: la parola, la fegura, la musega, l magnèr, l'èrt e l'artejanat.

Dò chela del 2009, dedichèda a l'Africa, dai 27 de setember ai 2 de otober l'é en program la seconda

edizion de “Su la Rotes del Mond”, che é stata prejentèda enstadì a Trent da l'Arziscop de Trent Mons. Luigi Bressa, dal President de la Provincia Lorenzo Dellai e da l'assessora a la solidarietà internazionèla Lia Giovanazzi Beltrami. E che é dedichèda a Asia e Oceania.

Chesta scomenzadiva – à dit Mons. Bressa – ne dèsc l met de pissèr che nos vardon l mond semper demò da noscia prospetiva. La tera va d'intorn, e la vida de la raprejentèr, de ne raprejentèr “a nord”, l'é demò na convenzion, no l'é che chi che vif te la pèrt che nos chiamon “sud” i stae col cef en ju e i piesc en su. L'é benfat donca ogne tant chierir enche de mudèr prospetiva, de veder la robes da n pont de veduda manco “Europa-zentrich”.

A ne didèr a cambièr prospetiva e ne compagnèr chest'outa “Su la Rotes del Mond”, sarà apontin i misionaries trentins che da egn vif te l'Asia, e apede ic enche esperc, scritores, testamonesc de nonzech, e amò jent che rua da chi Pajes dalonc e ades i se à fat ite chiò da nos.

Ogne dì a Trent sarà apuntamenc averc a duc per vardèr al passà e entener l prejent di raporc anter “Ozident” e “Orient” (semper per restèr te noscia prospetiva), per rejonèr de temes desche l dialogh

inter-religious, l raport anter tradizion e modernità, la dinamiche del svilup tel desvarià mond asiatic, olache se troa stories e cultures desferentes, e de spes te na fasa dè gregn mudamenc. Se podarà veder mostres con retrac che ne met dant aspec particulères de l'India piutost che de l'Himalaya o de la Mongolia, de la Filipines, del Vietnam o de l'Afghanistan. Se podarà enche se ensciuèr per tor pèrt ai pìcoi corsc de cojina asiatica te Piazz Dante, e tor pèrt a na lingia de scontrèdes, veder films o scutèr conzerc. I misionaries ne portarà la testimonianzes sun sia atività e su la tera olache i vif e la comunanzes che ge à dat la naa podarà i strenjer te n braciacol recognoscent, renforzan leames e magari envian via neves projec de sostegn e solidarietà.

En curt l program de la scomenzadiva

L program é jà peà via con vèlch anticipazion, e domenai ai 26 da les 21.00 al Doss Trento sarà l concert del grop anglo-indian “Dhol Foundation” endrezà da Cinformi, con entrèda debant. En lunsch ai 27 sarà la zerimonia ofiziala de inaudazion de l'event da les 11 da doman te sala Depero de la Provincia e via per la stemèna la senta maora sarà te l'ex-convent di Agostiniani



L'assessora Beltrami, Mons. Bressa e l president Dellai à prejentà la scomenzadiva.

de Trento, lo che l'é la “Scuola di formazione alla solidarietà internazionale” e olache sarà enche i stonc de la sociazions de volontariat trentines che laora te Asia e Oceania.

En lunsch ai 27, a Palaz Geremia da les 17 se rejonarà de “dialogh interreligious”; en mèrtesc ai 28 da la medema ora a la Fondazione Caritro l tem sarà “Gerusalemme incrocio di culture e di religioni” e da les 18.00 tel Palaz de la Region don Nandino Capovilla prejentarà l liber “Un parroco all'inferno”.

En mercol ai 29 te la scola “Centro moda Canossa” l tem sarà l raport anter tradizion e modernità e la di dò, semper da les 17.00 se rejonarà de cultures e inculturazion, con

referiment particulèr a la cultures indigenes de l'Oceania; i raporc storic, cultural e economics anter Ozident e Asia, da Marco Polo enschin anché, sarà argoment de vender prum de otober te la senta Fbk de Santa Croce.

Anter la scontrèdes “clou” chela en program en lunsch ai 27 da les 20.30 al Zenter Santa Chiara con Dominique Lapierre, autor de “La città della gioia” che rejonarà de Madre Teresa de Calcutta, per fenir en saba da ai 2 de otober con la veia misionaria tel Dom de Trent. L program entriech de “Su la Rotes del Mond” é a la leta sul sit www.missionetrentino.it. (lg)